

# Sur Paul Casanova, 1933–2017, Platengia/Sursaissa

Cun quest necrolog lein nus cun tut respect resumar cuortamein las impurtonas staziuns da sia veta ch'ei stada in fideivel, continuont e serius survir a Diu ed al concarstgaun. Purtar viadora al carstgaun cartent la ductrina da Cristus, il plaid da Diu, ei stau sia sublima lavour.

Sur Paul Casanova ei naschius iis 25 da settember 1933 a Platengia/Sursaissa sco otgavel affon dils geniturs Gion Battista Casanova, oriunds da Vrin, e Maria Barla Casanova, naschida Berther da Rueras, Tujetsch. El ravugl dalla famiglia, ch'era carschida el decuors sin 11 af-fons, ha el passentau si' affonza e giuventetgna. Ina greva frida ha tuccau la famiglia il settember digl onn 1938. Bia me-mia baul ei il bab Gion Battista morts. Da lezzas uras, ch'ei deva neginas rentas e neginas contribuziuns socialas, han la mumma ensemens cun ses affons stuiu sbatter per il survivor. A tuts ha ei mus-sau da spargnar, luvar e setener ensemens. Il fegl vegl haveva gest 16 onns, fetg baul da surprender in menaschi puril e segidar en famiglia. El ha denton prest empriu d'enconuscher la situaziun ed ha cun sustegn dalla mumma ed agid dils fargliuns dau damogn a quei grev pen-sum ed ha giu la posiziun da bab ed aschia s'engaschaus fermamein e segidau cun la mumma en l'educaziun dils affons minorens. La mumma ha saviu bien grau per quei sustegn e cun quel ed igl agid da scadin affon ei la famiglia carschida si ed ha plaun a plaun bandunau la casa pater-na per s'engaschar en la veta pulsiva ed ins astga dir che tuts han fatg lur carriera senza incaps.

Il svegliau buob, Paul, ha frequentau las scolas primaras e secundars a Cuort/Sursaissa. Gia sco giuven scolar ha el of-niau siu giavisch da daventar augsegner. Il spiritual vegn clamaus. Mo quei clom croda buca giu da tschiel. Ei drova per ordinari carstgauns che sveglan il plascher ed il desideri da daventar pastur dallas olmas. Aschia vegn ei era ad esser stau tier sur Paul. Naschius el ravugl d'ina famiglia religiosa, sustenius en quella decisiun digl augsegner dil liug e forsa era inspiraus da siu aug pader Vigeli Berher ha el sentiu baul il clom al survetsch pastoral.

Sper il pensum da scola ha el priu uras da latin tier igl augsegner dil liug per aschia saver entrar en la tiarza classa dil gimnasi dils paders benedictins. Senza breigia ha el repassau las classas latinas ed

ha terminau la scola media a Mustér cun la matura. Quei atun entra el en il seminar da s. Glieci e leu suonda il studi da teologia. La primavera 1959 vegn el ordinaus spiritual entras igl uestg Johannes Vonderach. Ord la Surselva ha igl uestg quei di astgau ordinare sis augsegners giu-vens. La messa nuviala ha sur Paul festivau iis 19 d'avrel 1959 a Cuort/Sursaissa. La vischerna ha spargnau neginas breigias e neginas cuosts per l'organiza-zion da quella singulare fiesta da primizia. Per quei engaschi ei sur Paul staus fetg engrazieivels. Per sia mumma ei quella fiesta bein stada il pli bi di da sia veta ch'ella ha astgau festivar e guder cuort avon sia mort.

Per sia emprema pastoraziun vegn el clamaus sco vicari en la pleiv S. Gions Mustér. Quei engaschi a Mustér ha czau entochen igl onn 1967. Ussa supren el la pleiv da Medel e pastorescha leu entochen igl onn 1978. En la pastoraziun a Medel ein legria e tristezia sebrattadas. Ina tresta regurdientscha ein stadas las grondas lavinas digl avrel 1975. Gronda legria ha el astgau guder a caschun dalla messa nuviala da sur Giusep Venzin ed el ei staus bab spiritual dil giuven plevon.

Naven digl onn 1978 entochen igl onn 1989 ha el pastorau la gronda pleiv da Trun. Sco plevon ha el astgau salvar il survetsch divin da bara per siu anterius vischin da Platengia, il renomau ed enconuschen pictur artist Alois Carigiet.

Naven digl onn 1989 entochen igl onn 2001 ha el pastorau las pleivs da Rabius e Surrein. All'entschatta da sia pa-storaziun a Rabius/Surrein ha el empriu d'enconuscher in scolar dall'emprema classa che ha adina puspei contactau el e fatg biaras damondas sur dalla pastoraziun, specialmein appartenent la scola-zion d'in augsegner. Sur Paul ha priu pe-dia per tontas damondas ed adina cuses-gliau el en la scolaziun teologica. Per plascher dil plevon ei quei buob suandaus ses cusesgls ed ei daventaus spiritual ed ei oz il pastur dallas olmas dalla gronda pleiv dalla Planira da Lonsch.

Plaschers e satisfaciuns ein sebrattai ed han occupau e purtau ventira al plevon Paul. El ei staus in perschuadiu augsegner e fideivel survient dil Segner, engrazieivels a lez per la biala e sublima clamauda sacerdotala.

Naven digl onn 2001 ha el gudiu il temps da pensiun a Cuort/Sursaissa. Muort la gronda munconza dad augse-



gners ei sur Paul segidaus vinavon cun las pleivs che duvravan e dumandavan siu agid. Specialmein a Sursaissa ed a Sur-cuolm eis el adina puspei staus a disposi-zion e gidau ora cura ch'il basegns clama-va. Sur Paul ei buca staus igl um da gronds discours. Sia sempladad, mude-stadad e discrezioen han adina accumpignau siu viver. El ha maina tratg en dubi las caussas fundamentalas da cardien-tscha ed annunziau quella autenticamein ed ha beneventau e susteniu fetg las re-fuormas dalla baselgia, tut specialmein che la liturgia en latin ei vegnida romon-tschada ed aschia daventada capeivila ed accessibla alla cumionza cartenta. El fu-va in adherent dalla reunion dallas pleivs cristianas.

Cun sia ferma vusch e bien dun mu-sical, probabel artaus dil bab, era el in cantadur incarnau. El cantava bugen, buca mo en baselgia, mobein era els chorus dallas differentas pleivs ch'el ha pastorau. La musica fascinava adina pu-spei el en siu temps liber. A caschun dal-la sepultura da siu padrin, Gieri, ha el of-niau ch'el hagi empriu da lez da sunar clarinetta. La clarinetta ha accumpignau el l'entira veta ora ed en casa pervenda sunava el adina puspei cun plascher siu in-strument preferiu.

Sco caplon d'armada engaschau eran sia ferma vusch e siu dun da purtar alla schuldada il plaid da Diu buca da pintga muntada.

Duront las vacanzas ha sur Paul ensem-en cun ses collegas da studi ni confami-

liars interpriu differents viadis viadora el mund. Specialmein Peru, la tiara nua ch'in da ses zun prezai camerats da studi pastorava, ha el visitau differentas gadas. Ils cuolms e las alps haveva el bugen ed ensemens cun confrars han els interpriu fetg biaras turas campestras ed el fuva adina fascinaus dallas muntognas e da quei mund alpester.

Carschius si en ina famiglia purila ha-veva el empriu da luvar sil funs ed el sa-veva ir entuorn cun l'iseglia dil pur. Sco augsegner senuspeva el mai da trer ora sia vestgadira d'augsegner e prender enta maun risti, faultsch ni fuortga e segidar sil funs. Il puresser e special ils animals han adina fascinau el ed aschia ha el gia en la Val Medel entschiet cun l'apicul-tura e la tratga d'aviuls ed el ha exequiu quei hobi entochen sia pensiun.

Da Numnasontga digl onn 2012 ha ina greva daguota dil tschurvi tuccau el tut anetgamein ed ha schirau ina vart da siu tgierp. Consequentamein eis el da quei mument enneu staus ligiaus vid siu letg e mai pli saviu bandunar quel. El ha saviu far nuot pli e malamein saviu dis-cuorer e mo cun agid dallas tgirunzas e dils da casa ha el saviu viver. Tgei che quei ha vuliu dir per in um ch'era disaus dad ir giudora e sin viadis alpesters sa-vein nus mo s'imaginar. Quei um vital e ferm da persona ei seremess e priu en-contre siu destin senza selamentar. Sch'ins dumandava el co ei mondi ri-spundeva el cun fleiva vusch «bein». Malgrad la situaziun selegrava el da mintga viseta ed enconuscheva il pli sa-vens ils visitaders, specialmein selegrava el dallas visetas dils confamiliars ed augsegners dil contuorn. La notg sils 12 da schaner eis el sedurmentaus per adi-na. Il Segner ha clamau siu fideivel sur-vient alla beatadad perpetna.

Tschun dis suenter sia mort ha in pievelun en malencurada, la gronda baselgia da Cuort era fullanada, assistiu agl impressiunont survetsch divin funeral. Suenter quei edificont survetsch di-vin ha quei pievelun accumpignau las restonzas terrestras da sur Paul alla fos-sa sil santeri da Cuort/Sursaissa. Sur Paul ha bandunau nus e tut il terrester. El ei vivius en profunda cardient-scha cristiana e cun senn da responsabladad enviers il concarstagun, la natira e la crea-zion da Diu. El ruassi en la pasch dil Segner.

Tiu vischin ed amitg Fridolin Cahenzli, Breil